

Službeni glasnik BiH, broj 65/16

Na osnovu člana 46. stav (2) Zakona o strancima ("Službeni glasnik BiH", broj 88/15), a po pribavljenom mišljenju Ministarstva sigurnosti Bosne i Hercegovine, br. 06-02-1-4154/16-1 od 21. juna 2016. godine, Ministarstva vanjskih poslova Bosne i Hercegovine, br. 08/2-42-30-2-18990-1/16 od 27. juna 2016. godine i Službe za poslove sa strancima, br. 18.6.1-14.1-3866/16 od 29. juna 2016. godine, Ministarstvo civilnih poslova Bosne i Hercegovine, je donijelo

PRAVILNIK

O PUTNOM LISTU ZA STRANCA

Član 1. (Predmet)

Ovim pravilnikom propisuje se: forma, izgled i sadržaj putnog lista za stranca, potrebni dokumenti koji se prilažu uz zahtjev za izdavanje, postupanje prilikom izdavanja i druga tehnička pitanja vezana uz putni list za stranca (u daljem tekstu: Putni list).

Član 2. (Oblik i zaštitni elementi obrasca putnog lista)

(1) Obrazac putnog lista:

- a) četverougao oblika dimenzija 29,5 x 19 centimetara;
- b) odštampan jednostrano crnom bojom;
- c) sadrži grb Bosne i Hercegovine i serijski broj.

(2) Obrazac iz stava (1) ovog člana sadrži i zaštitne elemente.

(3) Tehničku specifikaciju zaštitnih elemenata utvrđuje Agencija za identifikaciona dokumenta, evidenciju i razmjenu podataka Bosne i Hercegovine.

(4) Tehnička specifikacija ima stepen tajnosti.

(5) Stepem tajnosti tehničke specifikacije utvrđuje direktor Agencije za identifikaciona dokumenta, evidenciju i razmjenu podataka Bosne i Hercegovine u skladu s važećim pravnim propisima o zaštiti tajnih podataka i ne objavljuju se u "Službenom glasniku BiH".

Član 3. (Sadržaj putnog lista)

- (1) U putni list unose se lični podaci stranca kojem se izdaje putni list.
- (2) Na putni list se lijepi fotografija stranca, kojem se izdaje putni list na za to predviđeno mjesto.
- (3) U putni list se unose podaci o članovima porodice stranca kojem je putni list izdat, ukoliko oni putuju s njim i lijepe njihove fotografije na za to predviđeno mjesto.
- (4) U putni list unose se podaci o organu koji je putni list izdao sa datumom izdavanja i datumom roka važenja.
- (5) Putni list mora biti potpisan od strane ovlaštenog lica i ovjeren pečatom organa koji je putni list izdao.
- (6) Obrazac putnog lista je sastavni dio ovog pravilnika (Obrazac 1).

Član 4. **(Putni list za stranca)**

(1) Putni list, u smislu člana 43. Zakona o strancima (u daljem tekstu: Zakon) je putna isprava koja važi za jedno putovanje, a izdaje se strancu:

a) čija je važeća putna isprava izgubljena ili je uništena i ne može se zamjeniti ili je stranac na drugi način bez nje ostao, a država čiji je državljanin nema svoje diplomatsko-konzularno predstavništvo (u daljem tekstu: DKP) u BiH, niti njen interes zastupa neka druga država, s ciljem da se tom strancu omogući povratak u državu u kojoj ima uobičajeno mjesto boravka ili u državu koja ga prihvata;

b) kojem je odobrena ili je bila odobrena međunarodna zaštita ili privremena zaštita ili je u postupku sticanja takvog statusa, s ciljem da mu se omogući dobrovoljan povratak u državu porijekla ili u državu u kojoj ima uobičajeno mjesto boravka ili u državu koja ga prihvata;

c) kojem je prestalo državljanstvo Bosne i Hercegovine, a radi putovanja u inozemstvo;

d) koji je u inozemstvu izgubio putnu ispravu za izbjeglice ili putnu ispravu za lice bez državljanstva koju je izdao nadležni organ u Bosni i Hercegovini radi povratka u Bosnu i Hercegovinu radi povratka u Bosnu i Hercegovinu; ili

e) koji je u postupku prisilnog udaljenja iz Bosne i Hercegovine radi povratka u državu porijekla ili državu uobičajenog boravka ili treću državu koja ga prihvata.

(2) Osim slučajeva iz stava (1) ovog člana putni list za stranca može se, ako za to postoje opravdani razlozi, izdati i u sljedećim slučajevima:

a) strancu, čija je važnost putne isprave istekla, a država čiji je državljanin nema svoje diplomatsko-konzularno predstavništvo u Bosni i Hercegovini, niti u Bosni i Hercegovini postoji diplomatsko-konzularno predstavništvo druge države, koja zastupa njene interese, kako bi mu se omogućio odlazak iz Bosne i Hercegovine;

b) novorođenom djetetu stranca, koji ima odobren boravak u Bosni i Hercegovini, a država čiji je državljanin nema svoje diplomatsko-konzularno predstavništvo u Bosni i Hercegovini, niti u Bosni i Hercegovini postoji diplomatsko-konzularno predstavništvo druge države, koja zastupa njene interese, kako bi mu se omogućio odlazak iz Bosne i Hercegovine;

c) strancu, kojem je priznat status supsidijarne zaštite, a koji nema važeću putnu ispravu, ili nije u mogućnosti dobiti putnu ispravu iz zemlje uobičajenog mjesta boravka, radi putovanja u inozemstvo, ukoliko postoje ozbiljni humanitarni razlozi;

d) licu bez državljanstva u slučajevima kada postoji pisani dokument treće zemlje da će prihvatiti stranca; ili

e) iz drugih razloga koje nadležan organ ocjeni opravdanim.

Član 5. **(Podnošenje zahtjeva)**

(1) Zahtjev za izdavanje putnog lista, podnosi stranac ili druge zainteresirane institucije ili ustanove iz Bosne i Hercegovine nadležnoj organizacionoj jedinici Službe za poslove sa strancima (u daljem tekstu: Služba).

(2) Za lica mlađa od 18 godina zahtjev za izdavanje putnog lista podnosi roditelj ili staratelj ili zakonski zastupnik.

(3) Zahtjev za izdavanje putnog lista podnosi se na propisanom obrascu.

(4) Izuzetno od stava (1) ovog člana putni list Služba može izdati i po službenoj dužnosti.

Član 6. **(Potrebni dokumenti)**

(1) Uz zahtjev za izdavanje putnog lista podnosilac zahtjeva dužan je priložiti dokaze, kojima u smislu odredaba člana 43. Zakona opravdava razloge podnošenja zahtjeva za izdavanje putnog lista.

(2) Pod dokazima u smislu stava (1) ovog člana smatraju se:

a) potvrda o prijavi gubitka ili uništenja ili iz drugih razloga neupotrebljivosti putne isprave, ili drugi dokaz izdat od nadležnog organa u Bosni i Hercegovini da je važeća putna isprava izgubljena ili je uništena i ne može se zamijeniti ili je stranac na drugi način ostao bez nje;

b) potvrda o prijavi gubitka ili uništenja ili iz drugih razloga neupotrebljivosti putne isprave, ili drugi dokaz kojom je strancu odobrena ili je bila odobrena međunarodna zaštita ili privremena zaštita ili je u postupku sticanja takvog statusa;

c) dokaz o odobrenju boravka u Bosni i Hercegovini;

- d) dokaz o prihvatu od nadležnog organa države koja ga prihvata;
- e) dokaz o prestanku državljanstva Bosne i Hercegovine;
- f) kopiju putne isprave čija je važnost istekla;
- g) dokaz iz kojeg se vidi da postoje ozbiljni humanitarni razlozi zbog kojih stranac mora biti prisutan u inozemstvu, a čiju ocjenu vrši Ministarstvo sigurnosti – Sektor za azil; ili
- h) drugi dokaz kojim se opravdava osnov podnošenja zahtjeva.

(3) Uz zahtjev za izdavanje putnog lista, stranac je dužan dostaviti dvije fotografije veličine 35 x 45 mm.

Član 7.

(Prijavljivanje gubitka ili uništenja ili iz drugih razloga neupotrebljivosti putnog lista)

(1) Stranac je dužan da gubitak, uništenje ili drugačiji nestanak putnog lista prijavi odmah po saznanju mjesno nadležnoj organizacionoj jedinici Službe ili policije prema mjestu boravka, a ako se ta činjenica dogodila van Bosne i Hercegovine najbližem diplomatsko-konzularnom predstavništvu Bosne i Hercegovine.

(2) Ukoliko je strancu putna isprava ukradena, nadležni policijski organ, odnosno nadležno diplomatsko-konzularno predstavništvo Bosne i Hercegovine u inozemstvu će nakon zaprimljene prijave o krađi izdati strancu potvrdu i istog uputiti nadležnoj organizacionoj jedinici Službe, radi prijave gubitka ili uništenja ili iz drugih razloga neupotrebljivosti putne isprave.

(3) Prijavljivanje iz stava (1) ovog člana, vrši se na obrascu "Prijava o gubitku ili uništenju ili iz drugih razloga neupotrebljivosti putne isprave", koji je sastavni dio ovog pravilnika (Obrazac 2).

(4) Uz obrazac iz stava (3) ovog člana, stranac je dužan priložiti dvije fotografije veličine 35 x 45 mm.

Član 8.

(Potvrda o prijavi gubitka ili uništenja ili iz drugih razloga neupotrebljivosti putnog lista)

(1) Nadležna organizaciona jedinica Službe, nakon što utvrdi identitet stranca, zakonitost njegovog boravka i istinitost navoda, izdat će strancu "Potvrdu o prijavi gubitka ili uništenja ili iz drugih razloga neupotrebljivosti putne isprave", koja je sastavni dio ovog pravilnika (Obrazac 3).

(2) Potvrda iz stava (1) ovog člana zamjenjuje stranu putnu ispravu stranca:

a) Za odlazak do diplomatsko-konzularnog predstavništva države čiji je stranac državljanin ili za odlazak do diplomatsko-konzularnog predstavništva druge države koja zastupa njene interese,

b) za boravak u Bosni Hercegovini do dobijanja nove putne isprave ili putnog lista države čiji je

državljanin,

c) za boravak u Bosni i Hercegovini do izdavanja putnog lista za stranca u smislu člana 43. Zakona.

(3) Nadležna organizaciona jedinica dužna je definirati rok važenja potvrde iz stava (1) ovog člana, koji ne može biti duži od 30 dana od dana izdavanja potvrde.

(4) Nadležna organizaciona jedinica dužna je na potvrdi, u desnom gornjem uglu, unijeti fotografiju stranca i unijeti otisak pečata u lijevi gornji ugao fotografije tako da fotografija ostane vidljiva.

Član 9. (Vraćanje pronađenog putnog lista)

(1) Putni list, čiji je gubitak prijavljen, a koji se u međuvremenu pronađe, vratit će se strancu, o čemu će se sastaviti službena zabilješka.

(2) Strana putna isprava koja je pronađena, a ne može se uručiti strancu na čije ime glasi, posredstvom organizacione jedinice Službe u sjedištu dostavit će se Ministarstvu vanjskih poslova u Bosni i Hercegovini, radi prosljeđivanja nadležnom organu države, koja je izdala putnu ispravu.

Član 10. (Obezbjeđivanje, distribucija i evidencija obrazaca)

(1) Obrasci koji su sastavni dio ovog pravilnika štampaju su na latiničnom i ćiriličnom pismu, na zvaničnim jezicima Bosne i Hercegovine i na engleskom jeziku. Putni list (Obrazac 1) obezbjeđuje Agencija za identifikaciona dokumenta, evidenciju i razmjenu podataka Bosne i Hercegovine i obrazac distribuira Službi na njen zahtjev, a ostale obrasce koji su sastavni dio ovog pravilnika obezbjeđuje Služba.

(2) Organizacione jedinice Službe su u obavezi da kopije prijava i potvrda o prijavi gubitka ili uništenju ili iz drugih razloga neupotrebljivosti putnih isprava kao i kopije svakog pojedinačno izdatog putnog lista ili eventualno pogrešno popunjenog putnog lista, dostave Službi u sjedištu, koja o istima vodi evidenciju.

(3) Evidencija o izdatim putnim listovima je sastavni dio centralne baze podataka o strancima.

Član 11. (Stavljanje ranijeg propisa van snage)

Danom stupanja na snagu ovog pravilnika prestaje da važi Pravilnik o putnom listu za strance ("Službeni glasnik BiH", br. 80/09 i 9/15).

Član 12. (Stupanje na snagu)

Ovaj pravilnik stupa na snagu osmog dana od dana objavljivanja u "Službenom glasniku BiH".

Broj 06-2-30-4-74/16

23. augusta 2016. godine

Ministar

Dr. sci. **Adil Osmanović**, s. r.